

1 XOÃO

Merepanika Xoão Iokanatsopatakiti

Xesosi “Teoso Sãkire” Inakori

1 ¹Nota iøkatsopata hĩte ĩkapani, iua “Teoso sãkire” inakori asãpiretini ĩkapani. Ātipirika auakari itxaua. Itxĩkitakari ikinipoko auãki inini. Itixi kamiko apisa iua aua. Atera kenakotari isãkire. Aõkiã ate atamatari iua. Auakoã amaãtakari iua. Ininiã atãopitika ate imarotari iua. ²Iua ikinipoko auãki inĩkitaãkari. Iuaka oerekaua atemoni. Ate imarotapekari iua, ininiã asãpiretai aãtamatakiti, akenakotakiti pakini. Ate sãpiretai hĩte iua ātipirika auakari, kãkiti auãki inĩkitaãkari, ininiã kãkiti auapikako Teosokata. Iua Xesosi Kristo inaãka akiritiko. Iua aua irikata, Teosokata. Iuaka oerekaua atemoni. Aãtamatarari iito. ³Ate sãpiretai hĩte aãtamatakiti, akenakotakiti pakini, amoianatakakiniua ĩkapani. Atão nisãpiretai. Amoianatakakaua Teosokata, Xesosi Kristo pakinikata. ⁴Ia sãkiretxiti aiokanata hĩtemoni, iteene hĩpoxokoniuatini ĩkapani.

Teoso Pokamara Atoko Itxa

⁵Teoso pokamara atoko itxa, kotxi maerekati !ikama. Ipiã !uari Teoso auiniãtaã, kotxi maerekati !ikama. Ikara iokanapirena imi sãpiretaua ate. Ininiã ate sãpiretai hĩte. ⁶Maerekati akamakasaaki, ipiã auakani atoko atxa. Iuasaaki, “Teoso amoianata,” aniniã, paxirari asãkire. Kona atão akamakiti iuasaaki. ⁷Teoso aua ikamaraã, kotxi erekarinoka ikama. Ate ikamaraã aũuniã Teoso atoko aniniã, erekarinoka akaminiã, ininiã ate Teoso sãkire

auiãkani moianariakori atxaua, ininiã amoianatakakaua. Ikamaraã aãuiniã, Teoso arokaua Xesosi arêkaã. Imaktxakari ikinika maerekati akamakiti, kotxi imi Xesosi Kristo ipina ate ìkapani. Iarêka xikepoakata ate maerekani imaktxakini ìkapani.

⁸“Na nota kamari maerekati,” aniniã, ateka misirienetaua. Ikara atoko aniniã, ate ìmarotari atão Teoso sãkire aãkixinireẽ.

⁹Amaerekani Teosomoni asãpiretiniã, iua maktxakapitikari amaerekani. Oeretari ate ãkixinire. Imaktxakari ikinipoko amaerekani. Ikamari ikara atoko, kotxi imaktxakaenetari amaerekani. Ikamapitikari ikamaenetakiti. Ikamapikari atão.

¹⁰“Uatxapiima maerekati !nikama,” pininiã, pitemoni Teoso sãkire paxirari atxiiti? Kotxi Teoso txapekari kãkiti: “Maerekati kamakari kãkiti.” “Maerekati !nikama,” pininiã, !pimarotari Teoso sãkire pãkixinireẽ. !Pikamari Teoso sãkire iaõka iuasaaki.

Kãkiti Teoso Atão Imarotakari

2 ¹Namariteni nota tirketakini atoko hĩtxaua hĩte. Ikara niõkatsopata, maerekati himakamakani ìkapani. Maerekati akamakasaaki, masãpiretari Xesosi Kristo. Aĩri Teoso misãkiretakari itxaua Xesosi. Atão inakarínoka kamakari itxaua iua. Iua misãkiretari Teoso ate ìkapani, amaerekani imaktxakini ìkapani. ²Iua maktxakari maerekati akamakiti. Kona ate maerekaninanini imaktxaka. Ipina ikini itixiti auakani maerekani imaktxakini ìkapani.

³Teoso paniãtakiti akĩpitiniã, atão aimarotari Teoso. ⁴Teoso paniãtakiti makĩpitakati, “Nota imarotari Teoso,” inakari, paxirari isãkire. ãkixinireẽ !imarotari atão inakari Teoso sãkire. ⁵Teoso sãkire kĩpitakari iteene tirketari Teoso. Kininiãpa aimarotatari iua nakiti aniniãua? ⁶Akamakiti ikiniõtika Xesosi kamakiti atokokana akaminiã, iuasaaki aimarotari Teoso nakiti aniniãua. “Teoso nakiti nitxaua,” pininiã, pikamariko Xesosi kamakiti atokokana.

Iteene Matiretakakaua

⁷Nitiretakini, Apiananiri paniãtaua atiretakakiniua. Ia paniãtxi niõkatsopatakiti hĩtemoni, kona amaneriikani. Hĩkenakopiretapekari ikara paniãtxi merepitipanika Xesosi sãkire hĩkenakotakasaaki. Iuasaaki hĩkenakotari ikara paniãtxi hĩtirketakakiniua tĩkane. Ikara paniãtxi kitxakapirĩkari itxaua. Hĩkenakotapekari ikara paniãtxi. ⁸Iuaritika ikara paniãtxi amaneri itxaua. Xesosi kĩpitari

ikara paniãtxi, kotxi itiretari kãkiti. Hĩte apaka tiretari kãkiti, ininiã aimarotari ikara paniãtxi ereka inini. Ininiã ipiã napaãpota, kotxi kãkiti imaroãpotari atão Teoso sãkire. Atão inakari kãkiti imarotakasaaki, pokamarari atoko itxa kãkiti ãkixinireẽ.

9“Pokamara naua,” pininiã, txamari iuasaaki pomanatari pitari Xesosi sãkire auĩãkari, ikara atoko pininiã, uatxapiima ipiãã pauapanika. 10Pitari Xesosi auĩãkari pitiretiniã, pokamara pauapitika. Ininiã erekari pãkixinire, ininiãkara pãkixinireẽ auakari kona txĩkitakai maerekati pikamini. 11Pitari Xesosi sãkire auĩãkari pomanatiniã, ipiãã auakari atoko pitxaua. Iuasaaki pitĩpokotapika ipiãã. !Pimarotari pisinimoni. Mõsiãreti atoko pitxaua, kotxi !apakata patamarauatini ipiã xika.

12Namariteni nota tiretakini, niõkatsopata hĩte ĩkapani, kotxi Xesosi makatxakapekari himaerekani, kotxi kãkiti maerekani makatxakakari itxaua.

13Hĩte irĩtxiakoripekana, niõkatsopata hĩte ĩkapani, kotxi hĩte iteene imarotari Xesosi, itixi kamikosaaki auapeka inakari.

Hĩte ãtokoriakoripekana, niõkatsopata hĩte ĩkapani, kotxi homitikapekari Satanasi hĩtapararitika.

Namaritenipekana, niõkatsopata hĩte ĩkapani, kotxi himarotari aĩri Teoso.

14Hĩte irĩtxiakoripekana, niõkatsopata hĩte ĩkapani, kotxi himarotari Xesosi. Itixi kamikosaaki auakaripeka itxaua.

Hĩte ãtokoriakoripekana, niõkatsopata hĩte ĩkapani, kotxi pataparari hãkixinire. Teoso sãkire auapika hãkixinireẽ. Homitikapekari Satanasi hĩtapararitika.

!Hinirekapiri Itixi Auakani Nireẽkiti

15Itixi auakani nireẽkiti atoko inakari !hinirekape, kotxi ninoa nirekari maerekati ikaminina. Hĩtiretiniãri ninoa kamakiti, !hĩtoretari aĩri Teoso. 16Maerekati kãkiti kamakiti ia atoko itxapaniko: Inirekarina maerekati iĩtona nireẽkiti ikaminina. Inirekarina maerekati okina nireẽkiti ikaminina. Iuikauana, katii ininiãuana. Iuikarina ikamakitina. Ikara maerekati kãkiti kamakiti potorika ĩkorapokoriti. Kona Teosomonikirini ikara. 17Itixi xipokako. Ikinipoko tiitxi kãkiti nireẽkiti apaka xipokako. Kãkiti Teoso nireẽkiti kamakarirako !ixipoka. Auapininiika Teosokata.

Kristo Omanatakani

18 Namariteni nota tirketakini, itixi xipokini õti katanapananoka apoka. Kristo omanatakani auite apokako itixi xipokini õti apisa. Ikara himarotapeka. Uatxa Kristo omanatakani itomane apokapeka. Ikara atoko ininiã, aimarotari itixi xipokini õti takotepeka inini.

19 Ninoa Kristo omanatakani, mitxi atekata apotiitaua, Teosokata aãpotiitakasaakiua. Txamari ninoa !auikari Xesosi sãkire ate auikiniri atokokana, ininiã ninoa sipe. Ninoa atão Xesosi sãkire auikaãkamako, atekata ikaikotapikamanako. Itakanapaua, kotxi ate auikari Xesosi sãkire. Ninoa !auikari.

20 Teoso, erekarinoka kamakari, sikapekai hite Erekaru Matamatakoti himoianari tĩkane. Ininiã hite imarotari atão inakari Xesosi sãkire. 21 Hite imarotari atão inakari Xesosi sãkire, iuaritika niõkatsopata hitemoni. Niokanatsopata hitemoni, kotxi himarotari atão inakari. Paxiene kamakari !imarotari atão inakari sãkiretxiti.

22 Natokopa itxa iua paxiene kamakari? Paxiene kamakari txari: “Xesosi kona Teoso mereẽkitini.” Kãkiti ikara atoko inakari Kristo omanatakari itxaua iua. Iua !inirekari aĩri Teoso. Imi apaka !inireka. 23 “Xesosi kona Teoso ãkirini” inakari, na kaikota Teosokata. “Teoso ãkiripitikara Xesosi” inakarirako kaikotapitikako Teosokata.

24 Hãuiritariko merepitipanika Xesosi sãkire hĩkenakotakiti kaikotini hãkixinireẽ. Ikara kaikotiniã hãkixinireẽ, Teoso ãkirikata hĩkaikotapikako. Aĩri Teosokata hĩkaikota apaka. 25 Xesosi sikaenetapekaua aãuapininiika anini Teosokata.

26 Niõkatsopata hite nõtãkikini ĩkapani, kotxi aua kãkiti Xesosi hĩtakanapini nireẽkani. 27 Erekaru Matamatakoti, Xesosi sikakiti, auapanika hite ãkixinireẽ, ininiã hite na nirekari ãti koerekareri. Iua Erekaru Matamatakoti oerekai ikinipoko. Iua oerekakiti atãopitika. Kona paxieneni iua. Ininiã hĩkaikotako Xesosikata, Erekaru Matamatakoti oereẽkiti hĩkĩpitini.

28 Ininiã namariteni nota tirketakini, himoianatapikariko Xesosi. Ininiã uaimoni ikanapiriãkasaaki, hĩpĩkarauatini !uari. Ininiã na hĩpẽtauata haõkitakasaakiri iua. 29 Xesosi kamari atão inakarinoka. Ikara himarotapeka. Ininiãkara himarotari, kãkiti atão inakarinoka kamakani Xesosi anaakori ininiuana.

Teoso Anaakori

3 ¹Aĩri Teoso iteene tiretaua ate. Hīxinikariko iua tiraōki. Iua iteene tiretaua ate, ininiã, “Namariteni,” itxaua ate. Ari, atāopitikara Teoso anaakori atxaua. Ninoa Teoso anaakori minakanuia !auikari Teoso anaakori aniniua, kotxi ninoa !imarotari Teoso. ²Nitiretakini, Teoso anaakori atxapekaua uatxa. Eereka !aimarotari kanatokoako atxapaniko. Ia aimarotapitika. Xesosi kanapiriākasaaki, Xesosi atoko atxapekauako, kotxi iuasaaki aātamatariko iua. ³Kākiti ikara auiākani, !nirekarina maerekati ikaminina, kotxi Xesosi !ikamari maerekati.

⁴Maerekati kamakari !ikamari Teoso paniātakiti. Amakamakanisaakiri Teoso paniātakiti, iuasaakipeka akamari maerekati. ⁵Himarotari Xesosi apokapeka !korapokoriti maerekati akamakiti imaktxakini !kapani. Xesosi !ikamari maerekati. ⁶Kākiti Xesosi ātipirika moianatakari !nirekaikari maerekati ikamini. Iua ātipirika maerekati kamakari !aōkitapanikari Xesosi. !Imarotapanikari Xesosi.

⁷Namariteni nota tiretakini, !hāuiritapiri apanakini misirienetini hīte. Atāo inakarinoka kamakari kamapitikari Teoso nireēkitinoka, Xesosi kaminiri atokokana, kotxi Xesosi kamari atāo inakarinoka. ⁸Ātipirika maerekati kamakari Satanasi nakiti itxaua, kotxi Satanasi kamapikari maerekati. Itixi kamikosaakipekara ikamaāpokatapitiporiri maerekati. Uatxa ikamapanikari. Teoso ākiri apoka !korapokoriti maerekati Satanasi parīka ixipokini !kapani.

⁹Teoso anaakori !nirekaikari maerekati ikaminina, kotxi Teoso aua ākixinireēna. Ininiã !iposotarina maerekati ikamaāpotinina, kotxi iritarina Teoso. ¹⁰Ininiã kipa Teoso anaakori txataua? Atāo inakarinoka kamakanira Teoso anaakori txaua. Āti tiretakanira Teoso anaakori txaua. Ininiã kipa Satanasi anaakori txataua? Erekari makamakanira Satanasi anaakori txaua. Āti matiretakanira Satanasi anaakori txaua.

Kākiti Tiretakakiniua Pirena

¹¹Matiretakakaua. Merepitipanika Xesosi sākire hīkenakotakasaaki, hīkenakotari ikara otākipirenatxi, hītiretakakiniua. ¹²Kaiĩ inakori atoko !hītxape. Maerekatinoka kamakari nakiti itxaua iua Kaiĩ. Satanasi nakiti itxaua. Kaiĩ okari atāo itarika. Kixikapa okari? Ixikotiniri xika okapiri, kotxi itari kamari erekarinoka. Kaiĩ kamari maerekatinoka.

¹³Nitariakori, Xesosi sãkire mauiãkani omanatakasaakii hĩte, !hĩtsorĩkaãtapeko. “Kixikapa ninoa omanataua ate?” !hĩtxapeko, kotxi ikara atoko inakari apokapitikako. ¹⁴Atiretiniãri aĩtariakori Xesosi sãkire auiãkani, aimarotari !apinaika. Aãuapininiika Teosokata. Matiraõkiti ãkixinire ipĩkari atoko itxa. ¹⁵Kãkiti itari omanatakari, Xesosi sãkire auiãkari omanatakari, kokaniri atoko itxaua. Himarotari kokaniri !auari ãtipirika Teosokata.

¹⁶Xesosi Kristo ipina amaerekani imaktxakini ĩkapani, ãtipirika Teosokata aãuini ĩkapani. Ikara oerekaua atão tiraõkitxi. Ininiã erekari aĩtariakori atiretini. Xesosi turetiniua ate atokokana, erekari atiretiniri aĩtariakori. Atxiĩti apina aĩtari mapinakani ĩkapani. ¹⁷Pitii, pikiena pakini auiniãi, pitari, Teoso sãkire auiãkari tii, ikiena pakini mauakaniã, pisikariko iuamoni. Pimasikakaniãri iuamoni, Teoso tiraõki pãkixinireẽ !auari. ¹⁸Namariteni nota turetakinii, “Apanakini ate tureta,” atxaua, txamari kaamoni inakasaakina na asikana minakati, ininiã na atão atiretana. Atão matiretana apanakini. Kaamoni inakasaakina, masikana ninoa amonitakitina.

Teoso Sãkire Kĩpitakari

¹⁹Ikara atoko akaminiã, aimarotari Teoso anaakori aniniãua. Aimarotari atão inakari sãkiretxiti akĩpitini. Ikara atoko akaminiã, erekapitikari aãkixinire. Ikara atoko akaminiã, !apĩkari Teoso amisãkiretini. ²⁰“Kona erekano,” pininiã pãkixinireẽ, mitxi pimaerekani pikamini xika, !pipĩkarauatape, kotxi Teoso iteene imarotai, iuaritika iteene iamoniĩkai. Poiãoka aimarotari aãkixinireẽ auakari. Teoso imarotari ikinipoko.

²¹Nitiretakini, pãkixinireẽ: “Namanaãpekaru Teoso imakinika nimaerekani imaktxakini,” pininiã, kataparaxinirepitikai Teoso pimisãkiretini. ²²Ininiã iua sikaua aamanaãkiti, kotxi ate kamari ipaniãtakiti iaõka. Iua apokaerekatakatinoka akama. ²³Teoso paniãtaua ate: “Hãuikariko namarite Xesosi Kristo sãkire.” Apaka Teoso paniãtaua: “Hitiretakakauako.” Teoso paniãtaua ikara akamini. ²⁴Teoso sãkire iaõka kamakari kaikotapika Teosokata ãtipirika. Teoso kaikotapika iuakata ãtipirika apaka. Aimarotari Teoso kaikotini atekata, kotxi iua sikaua Erekari Matamatakoti aãkixinireẽ auini ĩkapani.

Atamakaerekarauatini

4 ¹Nitiretakini, lhãuikapiri ikinimane kãkiti sãkire, “Erekari Matamatakoti aua nota ãkixinireẽ,” inakani. Hãtaerekatanako ninoa. Atão Erekari Matamatakoti auatana atxiĩti ãkixinireẽna? Atxiĩti matamatakoti ãkixinireẽna auakari kona Teosomoni ïkarini. Itomaneri kãkiti, “Nota Teoso sãkire sãpiretakarino,” inakani, txamari na atão ninoa sãkire. Kãkiti ninoa atoko inakani aua ikini itixitika. !sãpiretarina atão Teoso sãkire. Imisirienetarina kãkiti. ²Kãkiti sãpiretiniãua: “Teoso ãkiri Xesosi Kristo apokapeka ïkorapokoriti. Kãkitipeka itxaua,” ininiã iuasaaki aimarotari Erekari Matamatakoti auapitika iua ãkixinireẽ. Ikara atoko aimarotari Erekari Matamatakoti Teoso sikakiti auaĩtotiniri kãkiti. ³Kãkiti sãpiretiniãua: “Xesosi na atão kãkiti !itxaua,” ininiã iuasaaki aimarotari Erekari Matamatakoti !uari iua kãkiti ãkixinireẽ. Matamatakoti iua kãkiti ãkixinireẽ auakari Satanasi nakiti itxaua. Kristo omanatakari nakiti itxaua. Iua Erekari Matamatakoti Teoso nakiti itxaua. Hikenakopiretapekari: “Maerekati Matamatakoti Kristo omanatakari iokanatakiti apokapitikako ïkorapokoriti,” itxa. Uatxa apokapeka.

⁴Hĩte namariteni, Teoso nakitiakori hĩtxaua. Ininiã hĩte !auikari atão minakati sãpiretakani sãpiretakiti, kotxi Erekari Matamatakoti hĩte ãkixinireẽ auakari apia posotiireri itxaua iua. Maerekati matamatakoti, Xesosi sãkire mauĩãkani ãkixinireẽ auakari, kaposotiireri itxaua, iuaritika Erekari Matamatakoti hĩte ãkixinireẽ auakari apia sikaimaroretai hĩte. ⁵Ninoa atão minakati sãpiretakani xinikakiti, itixi auakani xinikakiti atokotxikana, ininiãkara itixi auakani auikari ninoa sãkire. ⁶Atepekana, Teoso nakitiakori atxaua. Teoso imarotakari auikari asãkire. Teoso nakiti minakatua !auikari asãkire. Ininiãkara aimarotari kãkiti Erekari Matamatakoti auaãkixiniretakini. Iua Erekari Matamatakoti atãonoka isãkirauata. Aimarotari kãkiti ãti matamatakoti auaãkixiniretakini. Iua ãti matamatakoti kamisirienereri itxaua.

Teoso Tiraõki

⁷Nitiretakini, matiretakakaua, kotxi tiraõkitxi Teosomoni potorikakari itxaua. Katiraõkirini Teoso anaakori itxauana. Ninoa atão imarotari Teoso. ⁸Matiraõkiti !imarotari Teoso, kotxi Teoso tiraõkiuatapika. Tiraõkitxi Teosomoni potoriãkari itxaua. ⁹Teoso iokanatarari imatonõkari imi atemoni, Teosokata ãtipirika aũuini

ĩkapani. Ikara atoko ininiã, Teoso oerekaua itiretiniua. ¹⁰Ikara tiraõkitxi atão inakari itxaua. Mitxi ate !atiretari Teoso. Iuaritika iua tiretaua ate, ininiã iokanatarari imi atemoni ipinini ĩkapani, maerekati akamakiti imakatzakini ĩkapani.

¹¹Nitiretakini, ikara atokorako itxa Teoso tiretiniua, ininiã matiretakakaua. ¹²!Auari Teoso atamatakari, iuaritika Teoso auari aãkixinireẽ, atiretakakiniãua. Ininiã Teoso oerekaua atão atiraõkiuatini.

¹³Aimarotari Teosokata akaikotini ātipirika. Aimarotari Teoso ātipirika kaikotini atekata. Aimarotari ikara atoko inakari, kotxi iua sikari Erekarari Matamatakoti atemoni. ¹⁴Aātamatapekari Xesosi kamakiti. Akenakotapekari isãpiretakiti. Ininiã asãpiretari ikinimane, aĩri Teoso iokanatarari imi kãkitimoni, amaerekani makatzakakari ininiua ĩkapani, kãkiti ātipirika Teosokata auini ĩkapani. ¹⁵“Xesosi Teoso ākiripitikara,” ina sãkiretakani, Teoso kaikotapika ninoakata. Apaka ninoa kaikota Teosokata ātipirika. ¹⁶Aimarotari Teoso tiretiniua. Aũikapiretapitikari Teoso tiretiniua.

Teoso tiraõkiuatapika. Kãkiti katiraõkiri kaikota Teosokata ātipirika. Teoso kaikota ātipirika iuakata apaka. ¹⁷Teoso oerekapekaua atão atiraõkiuatini iua tiraõkiuatini atokokana. Ininiã kataparaxinireua Kristo apisatoõ aãpokasaaki, kãkiti misiritiko õtisaaki. Aimarotari ĩmisiritaua iuasaaki, ininiã kataparaxinireuako, kotxi ĩkorapokoriti aũuakasaaki Kristo atoko atxaua. ¹⁸Atiraõkiuatakasaaki, !apĩkarauata. Atão atiraõkiuatiniã, !auari apĩkare. Apĩkarauatakasaaki, amaãkaua.

¹⁹Atiretari Teoso, kotxi mitxipeka iua tiretaua ate. ²⁰Iua itari omanatakari, “Nota tiretari Teoso” ina sãkiretakari, paxirari isãkire. !Itiretari itari iuakata auakari. Ininiã ĩliposotari itiretiniri Teoso imaõkitakiniti. ²¹Ininiã Teoso paniãtaua: “Teoso tiretakari tiretariko itari apaka.”

Teoso Ākiri Auikiko

5 ¹Xesosi Teoso mereẽkiti itxaua. Ikara auiãkani Teoso anaakori itxauana. Aĩri Teoso atiretiniã, aĩtariakori apaka atireta, kotxi Teoso anaakori ninoa apaka txaua. ²Teoso atiretiniã, inireẽkiti iaõka akaminiã, aimarotari Teoso anaakori apaka atiretini. ³Teoso atiretiniã, akĩpitari ipaniãtakiti. Aposotari akaminiri ipaniãtakiti, kotxi na kamimari ipaniãtakiti. ⁴Aposotari akaminiri iua paniãtakiti, kotxi iua anaakori atxapekaua, ininiã isikataparataua, maerekati itixi

auakani nireẽkiti amakamakani ĩkapani. Kininiãpa isikataparataua maerekati ninoa nireẽkiti amakamakani ĩkapani? Isikataparataua, kotxi Xesosi sãkire aãuika. ⁵Kipa posotari maerekati itixi auakani nireẽkiti imakamakani? Kãkiti auikiniãri Xesosi Teoso ãkiri ininiãua, iuanokara posotari maerekati imakamakani.

⁶Xesosi Kristo Teoso ãkiri itxaua. Teoso oerekapekua Xesosi iua ãkiri ininiãua. Kãuaãriã Xesosi patxisatikosaaki isãpiretaua. Iuaĩkana Teoso sãpiretaua Xesosi iua ãkiri ininiãua, Xesosi ipĩkasaaki iarẽka ixikepoatakasaaki. Teoso sãpiretaua kona Xesosi patxisatikosaakinanini. Iua oerekaua Xesosi Teoso ãkiri ininiãua ipĩkasaaki apaka. Erekaru Matamatakoti sãpiretaua Xesosi Teoso ãkiri ininiãua. Iua atãonoka isãkire. ⁷Teoso tixini auakani ipi, ãti pakini oerekaua Xesosi Teoso ãkiri ininiãua, aĩri Teosoma, “Teoso Sãkire” inakorima, Erekaru Matamatakotima pakini. Naia ipi, ãti pakini ãtinoka. ⁸Īkorapokoriti auakani ipi, ãti pakini, Erekaru Matamatakotima, Xesosi patxisatikoma, Xesosi ipininima pakini oerekaua Teoso ãkiri ininiãua Xesosi. ⁹Kãkiti erekarini sãpiretakiti aãuikapitika, ininiã apiata maãuikari Teoso sãpiretakiti, kotxi atãonoka isãkire. Iuara sãpiretaua Xesosi iua ãkiri ininiãua. ¹⁰Teoso ãkiri auĩãkari ãkixinire imarotari ikara Teoso sãpiretakiti atão inini. Teoso sãpiretakiti mauĩãkati txari: “Paxirari Teoso sãkire,” kotxi !auikari Teoso sãpiretakiti Xesosi iua ãkiri ininiua. ¹¹Kiripa Teoso sãpiretaua? Iua sãpiretaua: “Nitxĩkitakai auãki hinini notakata hãuapininiika hinini tĩkane. Ikara atoko nitxĩkitakai namarite nakitiakori hinakasaakia.” ¹²Iua Teoso ãkiri nakiti Teosokata ãtipirika auako. Iua Teoso ãkiri nakiti minakatiaua, !auapani ãtipirika Teosokata.

Aãuini ãtipirika Anini Tĩkane

¹³Hĩte auikari Xesosi Teoso ãkiri ininiua. Niokanatsopata hĩtemoni, Teosokata ãtipirika hãuini himarotini ĩkapani. ¹⁴Teoso nireẽkiti atokotxikana aamanainiãri Teoso, aimarotari ikenakotari amisãkiretiniri, ininiã kataparaxinirepitikaua amisãkiretiniri, kotxi aimarotari iua apakapapiretapitikaua. ¹⁵Ikara atoko aniniã, aimarotari ikenakotari aamanaãkiti, ininiã isikapitikaua.

¹⁶Himarotakasaakiri pitari kaminiri maerekati, himisãkiretari Teoso iua ĩkapani. Ininiã Teoso makatxakari maerekati ikamakiti. Teoso kamari iua ãtipirika iuakata auini ĩkapani. Ikara maerekati makatxakiko auapitika, ininiã kona itxĩkitakari iua xinire ipinini. ãtião maerekati kãkiti kamakiti aua. Ikara maerekati makatxakiko

!auari, ininiã itxĩkitakari kãkiti xinire ipinini. Nota !õtãkikai himisãkiretiniri Teoso ikara atoko inakari maerekati kamakari ĩkapani. ¹⁷Teoso paniãtakiti amakamakaniã, iuara maerekati txaua. Iuaritika aamanainiãri Xesosi ikara maerekati imakatzakini, ininiã ikara maerekati !itxĩkitakari kãkiti xinire ipinini.

¹⁸Teoso anaakori atão inakani !inirekaikari maerekati ikaminina. Aimarotari ikara. !Inirekaikarina maerekati ikaminina, kotxi Teoso ãkiri nĩkatana ninoa. Ininiã maerekati auĩte Satanasi !iposotari imisiritinina.

¹⁹Ikini itixiti auakani auĩte itxaua Satanasi, maerekati kamakari. Iuaritika aimarotari Teoso anaakori aniniua ate.

²⁰Aimarotari, Teoso ãkiri apokapeka ĩkorapokoriti. Aimarotari iua sikaua imarore, ininiã aimarotari Teoso atão inakari. Akaikota iua atão inakarikata. Ari akaikota imi Xesosi Kristokata. Teoso atão inakari itxaua iua. Itxĩkitakaua iuakata ãtipirika aũuni.

²¹Namariteni, nota tirketakini, !hĩteosonetapiri Teoso minakatua. Ameẽ.